

香亭文稿

香亭文稿卷八

蓼園吳玉綸香亭

上鄭炳也先生書

竊某以蓼園樗櫟忝列門牆客臘公車北上得奉
教於夫子不待以衆人而期以國士幸甚愧甚被
放歸來一路霖潦連綿客狀殊惡季夏朔四日抵
鄂漢口為南北襟喉九曲亭前古賢豪遺跡猶在
覽魯臺汧口諸山川誠非寒瘦無聊所克表其形
勝署有鵠山頗幽邃去黃鶴樓數武誅茆選徑築

室數椽定省之餘少理故業成古體文三篇古今
體詩數十首習字萬五千有奇獲佳夢占之利父
師在官者維時家嚴適奉秦藩之

命矣伏惟夫子起居安吉福履攸綏世兄親承庭訓所
造當益進今春追隨左右商量舊學辨晰毫芒如
鄜州一首以得新解辨宋人用杜句看茱萸之謬
以細法律大抵皆聞所未聞某以管窺之見依類
深思嘆大宗匠學行深厚提要鉤元即一吟咏間
知人論世上溯淵源下開門仞所謂鼓吹大雅之

材蘊而恢之以黼黻

聖天子太平文治台階杓斗之占當有符夢兆而旋至
立應者且居今日以抗懷古人名之不朽皆有實
以副之太上立德次立功次立言即立言者不專
以詩文傳也而人未嘗不重其文與詩蓋有本之
言言以人傳非人以言傳以言傳者如榮華之飄
風好音之過耳以人傳者如日月之經天江河之
行地也學者惟希其實勿務其名於以馴致乎古
不難矣某聞夫子緒論久竊以此三不朽為夫子

信而亦稍自助也。束裝伊邇由樊襄一帶入關黃
葉西風衝寒跋涉學本弗植何堪重茲荒落擬於
明正赴都載侍函文永荷裁成私心嚮往更搖搖
如懸旌焉近課一冊乞賜斧削臨穎不勝依戀之
至

逼真韓文然非襲其貌也平日醞釀既深揮筆
便肖耳螟蛉子化豈其然乎

德定圖

學愈實則心愈虛品愈高則情愈摯於斯文見
之莊本淳

由詞章以窺源本一洩千里層次貫注文之以
氣勝者中間稍易之較前明淨前後體裁亦雅
近柳州 弋山二兄

附錄札一通

期虎文啟香亭中丞閣下馮太史歸得告領到諸
碑刻及公大集且損俸惠存一一拜受謹志不敢
忘公經義力追正嘉以前諸老風格而散文情文
悱惻可謂醇雅真歐曾之雲初也可傳可傳文老
病窮困本寡學而近尤廢失無可復語此事讀尊

著喜吾道為不孤矣數年來東原甫得一官遽爾
下世今年又喪筭河學士此皆吾黨眉目云亡之
歎如何可言聞嗣主壇坫者公與魚門覃溪二雲
諸公宏獎風流翔譽京華而秋帆中丞延接名俊
四方之有道而能文者歸之如流水德星之聚疑

在關中

天子右文諸公卿從而翊贊之人文化成於斯為盛尤
望公黼黻其間黜浮崇實得敦樸有用之才以事
其

上保民利國實在於是此固公承先報
主之素心而文有嘉於公之仕學互進而益上聊復及
之知不啻其迂濶也文得偏中之疾終年藥裹崇
文之席虛擬而已足跡未嘗一至西湖秋來手足
小便持行而家運惡劣精神益復委頓正不知尚
有幾何月日耳明歲仍舊館尚未知力疾能赴與
否如不能決當辭避此時心尚如懸旌未有所薄
也文三子亦粗解操觚而秋試屢薦不售公後起
有人聞之為公慶而孺仲不能無蓬厯之媿矣別

語另紙草此奉謝並候不宣辛丑十二月廿又一日
日文再拜啟謹空內子患乳巖之疾者越二載矣
至秋而劇至冬仲之晦而下世明秋擬卜宅兆以
歸其體魄而文之精亦銷亡盡矣即自為歸全之
計更無可復緩得埋骨有所一旦瞑目真含笑入
地矣妻喪何敢遠訃公輩通門之好不可自外且
旌障聯額率欲假諸舊游銜名以為光寵而可不
以聞乎此文所以赴告諸公之意非因以為利也
文意不能徧白幸公代白之外有書有訃或有訃

無書或有書無訃具開於後乞照所開遣長班分
送其一書致貴同年張名天相者張為阜城令今
聞調繁未詳何縣幸查明加封寄達文不能無望
渠麥舟之助公必速寄為囑又一書寄霸昌觀察
祥名禹者祥嘗受業於文者也文又啓

先炳也夫子歸田後每馳諭玉綸以讀書作人
之法寶而箴之奉為座右銘癸卯秋余試竣浙
聞督學於閩所有寄存書笥及手抄夫子致札
一卷批定玉綸詩文稿八本俱以甲辰春燬於

樸園太守姪賈家衡衡之舊寓不戒於火可惜也此札乃得之行篋中錄以附梓邇師承之有自傷墓草之久荒淚下泫泫竊不敢忘所得力云爾甲寅除夕前一日玉綸跋

上王蘭泉先生書

昨秋聚首忝附譜末帳侍浹旬辦香有託菊月望為先
慈敬卜窀穸拜別旋里愚兄弟幼冲失恃十有七年痛
裹大事血淚經營譬如三春寸草莫報罔極竊恐負臨
別丁寧重獲罪於君子之林春暮抵秦驚聞年伯母仙
遊敬寄生芻伏惟鑒納數載以來師友星散或亡於疾
或歸以故或作吏風塵抑鬱不得志翹思孝履讀禮家
門又睽雲雁酒闌燈爍未嘗不自悵緣慳也承示散體
文源流具見敦勉至意琦以蓼園散人心粗而貌似狂

未能多讀書以自適於道先生許以上接古人誠萬有
不逮而應試之作近則所見略同夫文無分於今古也
自唐始有古文之名宋乃有制藝之設體製略殊神而
明之法亦小異而大同至於發明義蘊運以才識助以
詞華皆期言之有物古與今無不同也彼蹈空擊虛精
意不存固優孟衣冠也若廣徵博引昧沒而雜見屏先
正抑工揣摩者所竊笑也大戴禮曰君子知不務多而
務審其所知此其說可通於文而制藝在其中矣香亭
近草一冊乞加斧削未審江湖萬古集中容一芥舟否

檢敝麓得堯峰文抄一本應是鄴架上物謹反趙陳卧
子詩稿便中幸借一讀清商四起旅雁驚寒渭樹江雲
人遐室遠先生六月之息蘭陔愛日著述必多而琦隨
家兄東西鹿鹿愧紹趨庭語曰努力崇明德皓首以為
期願終執斯言弗替也

雲上風疎建安格調非唐宋人尺牘生活也

鄭炳也先生

情深文明味逾諫果

褚筠心

與友人書

淮水有雙魚燕山有飛雁別來屢易寒暑未及一通音
問柴令親入都詢知柴氏婿君之子也舍姪大經君之
婿也今年同受業於君以應秋闈嘻君之子必鳴其盛
矣余大經姪向固精於勤懼以躁氣乘輕心掉也語云
臨淵羨魚不如退而結網又云舊學商量加邃密此中
意味皆可深思昨夜作家書寄寅兒自示以十二歲讀
五經最熟癸亥秋侍老親歸自山左晚過天妃開口河
水清連風日流利抽背周易繫辭說卦雜卦傳尚書盤

庚誥毛詩豳風各章終卷不錯一字慈願頗怡抵里閭
不數月覆按已不如前年復一年功程間斷譬之人久
不見追憶恍忽無復曩者篷窗掩卷瀉水瀾翻之樂汝
年正小宜及時勤習居業冀早成就勉之誌之大經姪
余同庚者秋試有望否呂東萊先生謂教子弟不以科
第為重此說誠然然功令所垂舍此無進身之階其始
得也可以博父母一日歡心其繼也可以覘終身品節
經濟非早早焉為一生吃著不盡地也東萊蓋謂學者
志趣不可專注於此寧薄科名爵位以鳴高乎君其告

余姪固而存之為拜獻先資也。柴昆季以同氣參商異鄉飄零為酌囊金就一官分發尚須綿力歸而謀諸君若其家門事未深知亦不過問所謂骨肉之間他人蓋難言之。夫驚聲華者薄本支蠱妻孥者傷同氣此中情狀不啻萬端。嘗讀棠棣一詩閱管蔡之不咸未嘗不歎古聖人於死喪急難中抑揚唱嘆其音何哀以思也。弟素性簡懶豈於柴氏謬越其俎附成美以矜古道抑亦閱牆之遇可哀吾中大有所不忍而已。非獨戚戚於瓜葛也。西風釀露柿葉飛霜足下當此高秋清景為樂何

極第需次在旦晚間矣安得高卧林泉嘯傲吳頭楚尾
間耶已卯中秋前一夕某白

以課子者勉姪切實深至入後須玩其叙次委折含
蓄不盡處成人之美尤見古風

方碧岑

鏤心刻骨之言以敦厚和平出之可以見用心之厚
受業宣枋

致蔣心餘太史書

別來屢閱寒暑音問雖疎彼此道義相勗期不戾於古
人之意十餘載如一日往者大兄絳幃駐越宏獎後起
嵇山士彥至今稱道弗替迨移廣陵奉母來居白華孝
養之思藹然于瓜步秋潮蕪城春色間遥念文選樓頭
二分明月照我良朋清影團圓永誌歡慶去冬胡少冠
來都詢悉行箴旋讀詩章情懷如訴風調彌高日來退
食未暇另當繼聲抑亦言不能達意故無好句若以泛
泛酬應當之非所以奉教於知己也頃聞伯母仙逝曷

勝駭愕風稔吾兄至性至情隨處流溢每於良辰高會
開筵觀劇忽出涕不自禁或對客竟忘酬酢余從旁目
擊亦為盡然傷懷蓋非觸於兒女之情而動以忠孝之
性。往。往。然。也。今。歸。養。十。餘。年。得。于。淚。泗。萱。堂。之。日。附。身。
附。棺。必。躬。必。慎。較。侍。之。遥。聞。先。大。夫。凶。信。奉。湯。藥。既。僅。
餘。長。媳。用。美。木。則。蓄。自。姻。婭。養。生。送。死。毫。未。親。承。徒。抱。
恨。於。終。天。不。堪。回。首。者。賢。不。肖。相。懸。萬。萬。矣。芬。餘。敝。通。
家。旋。里。附。誄。額。一。幅。挽。對。一。聯。奠。儀。一。函。聊。代。生。芻。藉。
申。遥。薦。端。此。佈。唁。不。盡。依。依。

中幅現身陪說沁心入骨具見相交以道之意

朱竹君

入後心血并出此秋聲也無處非風木之感

胡羽堯

摹寫心餘先生情態處恐朱繇筆墨所不能到入後
觸目興懷語極悲愴本至情以流為至文固宜其沁
人心脾也

受業陳池鳳

答諸兄委董輯家譜書

去歲嘉平廿二日姜成到京接諸兄公諭一紙以董輯家譜見委仁孝之言溢於楮墨事關表揚先德垂裕來茲為人後者自有同心惟是增輯匪易成一家之書如來示所云歸於賅洽典贍更匪易易邇自三代而降上無掌繫之職私譜以興其後士大夫以門第高譜牒之學亦貴經宋元明兵火之餘故家譜系漸就凌夷我祖文盛公以明洪武初始遷金剛臺家譜遂亡四伯父雞澤公於代遠年湮服舊德而懷先疇各處搜羅存冊

子百餘頁。一片苦心。始基立矣。闕畧尚多。若據此冊而徒事潤色。文勝於質。非體也。今欲增益之。則搜羅宜廣。尤宜確。蓋萬物本乎天。人本乎祖。由天地而旁推之。有民物由祖宗而旁推之。有族姓由父母而旁推之。有兄弟自一世以至十世。數十世皆由一人之身而分也。故採之不廣。則應附不附。是棄親也不仁也。收之不確。則非附而附。是誣親也不義也。仁至義盡。古人所以觀於族譜。孝弟之心。油然而生。諸兄承難澤公舊業。欲續加增輯。請於諸叔父進翰階。搢階。蔭庭姪而聽命焉。玉綸

雖遠宦於京。譬如行旅。酬之禮於廟中。皆以有事為榮。
抑竊有請焉。譜以表傳。兼載為是表。而不傳未免太簡。
事實難於考証。有並載詩文集者。卷帙太繁。似應以著
某書若干卷。載入傳中。而詩文全集別本流傳。則譜乘
卷帙不至過多。子孫出門。亦易攜帶。即如文盛公以白
馬駝家譜。未必不因卷冊浩繁。致委全書於兵火耳。至
綿力所竭。族間公事。分應衆擎。承念及長安清苦。愛弟
甚矣。第飲水思源。亦欲報春暉於寸草。所自盡此區區。
者。肅復請安。餘容續達。

中間揭出廣採確收兩意本仁義以立言精當不磨
亦真懇有味允垂家法兼擅史裁

褚笏心

見得明確說得深穩直與老蘇並傳

受業秦承業

致周司馬為從兄立傳書

歲甫入秋都中傳言木果木之役從征將卒多死
事時從兄炳臣以典史守澤耳多糧站適近其地
某聞信輒懼然呼曰此必從兄死矣家人方以為
怪翌日報至乃信某固知其必死第其赴死顛末
迢迢萬里外欲一叩消息不可得為悲且悵者蓋
數閱月念從兄少與某共塾讀書平生多意氣精
悍之色見於帖括間遇前人節義諸傳未嘗不慷
慨為某陳說曾幾日耳乃竟與在事諸君子從古

烈士於地下一命初試而成就卓卓若此此其足以不朽者矣夫忠烈之行不可以不章昆季之間尤不忍聽其湮沒每思從退食暇撰次其事而告者不詳輒復擱筆昨使者自軍中還蒙示從兄死節事甚悉且詢及生平梗概既為一一陳之益以見閣下盛德古風厚視年家子在外則訪其與站誓存亡被害較烈各情狀入又求其素行於骨肉間何眷眷不忘如是倘亦大君子本忠孝之性寓意激勸不惜奮其鴻筆發為文章之死而致生之

歟。果爾則某所數月惘然得大人先生以考核之信而有徵者見諸敘述當必過某所為萬萬者以閣下儀型當代著作之才侔於班范若賜之傳贊垂信家乘使臨難捐軀之節以人重益以文重則從兄可以不死而某亦獲竟手足拳拳不忍聽其湮沒之慄斯蒙愛莫大於是近奉

詔查辦木果木死事諸臣予祀予蔭

恩至溥也異日史館中將採其事實入昭忠傳即當持此應之矣。激切佈悃待命不宣。

前路層層伏案後半照應結束昌黎之雄半山
之峭兼而有之諸笏心

疎密相間史公文法一種潔削之致恍對秋山

天淨景象受業曹振鏞

恭錄家傳一篇

吳鉞傳

周 煌

君姓吳氏諱鉞字炳臣號左黃固始人父士能庠
生君生三歲而孤既長貌魁岸多力性剛直遇鄉
里不平事多為人排解或怒色爭聞母命輒懣服

不敢言屢躋于場屋乃納粟得主簿分發四川署
彰明彭縣典史借補營山縣典史乾隆丁亥戊子
間滇省方用兵兩解牛馬赴滇軍功加一級三十
八年正月

大兵深入金川委守喀喀糧站調澤耳多糧站君精
神周匝遇事敢為官雖卑大吏倚重俟功成奏且
破格用六月十一日賊犯木果木大營大帥死澤
耳多去大營六十里其大營以東澤耳多以西松
林溝赤里角溝站俱被奪聲洶洶賊垂至有勸君

走者君奮然曰吾奉命守此與站存亡分也與吾
共殺賊者吾骨肉也因拔所佩刀立木城旁曰敢
言走者斬衆心稍定迨賊至君率兵及夫役等相
接殺賊勢稍潰俄望見飛騎四面如雲集自顧敗
殘士卒餘無幾流矢火光繞木城環相攻也曰死
耳死耳余官雖卑恨不能報

國矣遂被害被害時猶徒手殺數人血淋漓遍體事
聞贈鑾儀衛經歷入昭忠祠蔭一子廷淦如其官

贊曰方金川未平時余以公事奉

命赴軍前聞人士言木果木之變諸君死事狀稱吳君
死尤烈比還京與君從弟香亭太常言之因為余
述其生平如此殆忠孝出于其性者然余與君叔
為同年友知其先有以武功顯者今君文吏且小
吏耳而卒能殺身成仁于以先
國典而無愧於其先也嗚呼可不謂偉男子哉

答方耐齋書

三月初五日接四兄手翰猥以亡室任夫人葬事
重承枉奠指示周詳舍其舊而新是阡繪圖以寄
機祥之說我不敢知所慰者平安兩字向例作碑
版文字不諱言謝重其事也豈亡者之體魄賴以
封且安而忘之乎弟與君家素託姻好自庚子春
假省還

朝蹤分南北抵閩復與諸郎君判袂京華不得覘所
學進境者久矣已往之光陰如掣電後生之期望

如○置○郵○想○阿○翁○同○此○情○懷○耳○弟○邵○武○試○竣○按○臨○汀○
州○汀○為○牛○女○分○野○其○水○南○流○入○於○海○出○丁○位○利○科○
甲○故○以○汀○名○郡○閩○重○形○家○言○而○汀○為○甚○諸○所○見○墓○
門○安○置○備○極○精○整○前○由○邵○而○汀○也○在○清○明○之○後○三○
日○翠○華○蓮○峰○間○塚○上○掛○紙○錢○者○纍○纍○矣○頗○觸○春○露○
秋○霜○之○感○因○思○禮○經○載○卿○以○下○有○圭○田○四○牡○之○詩○
曰○不○遑○將○母○古○聖○王○恩○明○意○美○不○啻○入○其○室○家○代○
為○籌○畫○予○以○祭○而○豐○念○其○祿○之○養○皆○本○至○性○至○情○
所○推○及○非○以○發○其○天○地○生○成○之○感○為○奔○走○公○孤○鄉○

尹百執事之具也。然上所以慰勞而逮恩者。既如禮與詩之詳。且至百爾君子載馳載驅。自不容一刻緩。所謂士重報禮忠尤性生者乎。况余奉冰鑑於

九重之

訓。歷星軺於三載之間。月旦從容按期歲事。非若遺大投艱之况。瘁也以視四兄樂天倫於誦讀望佳氣以登臨逸者。忘其逸。猶勞者忘其勞也。君子素位而行。易地皆然。要以東坡若過七十年。便是百四

十之說思之所得較多健美何似

忠孝至性流露於閒情逸致中所謂頭頭是道

也三千世界藏於一壺信然

陳伯恭

不作尋常寒暄語澹思濃采委折盡致

受業玉保

答任澄源書

累世朱陳連理中斷兩接手書知汝迎柩於大山旅次
臨穴於鶴峰橋邊彌深感戚汝父甫去世又遭汝母喪
家門如此夫復何言寄奠一緘聊備生芻大淮日夜流
未足喻老淚之滾滾耳前邵武歲試竣拜汝曾祖遺像
詢及老諸生猶有能言先太守遺事至泣下者歸而告
之汝祖姑母將作信寄汝家知之未幾汝祖姑母與汝
父母俱後先去世茲於科試衡校之餘漏殘燈炮輒舉
五十餘年所聞所見哀愉忻戚往來於懷不能去由歲

利
試而思所聞餘韻流風既景行以傷隔世由科試而遡
所見譬若珠光泡影轉瞬增悲每吟所遇無故物焉得
不速老之句不禁三嘆焉恐修名之不立也嘗聞族之
大也如大木然入地深者叅天必茂若發洩太盛受之
以畜而後厯久常新古人所以於隆隆炎炎之家恒致
警於再實之木其根易傷也諸郎君勉乎哉承先澤之
未艾培生意於無窮以有剝必復者易否為泰尚其勵
潛修光祖德俾余親見之為破涕一笑焉則幸甚

中幅大言炎炎要實不易之理較馬明德所云發揮

尤為酣暢

徐兩松

畫雲漢圖則熟畫北風圖則涼境由心生也無斯二
者於尺素中忠告之言畫工之筆

顧星橋

從拜瞻遺像叙入貌未瘁而神已傷歸到箴勉意作
結名言可佩筆墨之感人深矣

退菴二兄

致孔雲楣書

啓者舍妹抵都後即患腰癱調治月餘甫平復接東信
知大甥瘋症復發致甥媳胎墮各情節頗悶於懷嗣於
六月初接患傷寒症延醫王姓及雲坡司寇所舉黃姓
醫參酌立方未見轉機以戚進士通家參黃並用法試
之似得手專服其方奈邪雖退而胃不開延至七月七
日戌時辭世痛哉骨肉之情本不容已送死尤大事為
購得杉枋及一切附身棺之具以含以殮既固既安十
七日移厝尼庵發引時不用僧道從孔氏教也今走信

奉聞存亡離合大數使然幸勿過悲致觸尊慈懷抱大甥瘋病已久若遇神清飲痛時願請來京扶柩當力止之母令在途滋事吾妹與大弟結褵三十餘年僅貽此子所望怙而無恃留心防範加調治以冀漸痊他日得見舅如見母則幸甚書至此淚潸潸下矣大弟六月暫息清況素所深悉老母年高未可遠離晨昏俟酌委安人到京搬柩自當稍申將伯吾妹未卒之前一月第八兒以病夭後二日歸韋家孫女亦亡愚於心緒惡劣左右支絀盡區區兄妹之懷約計前後糜五六百金力不

從心不忍不及情也為作輓聯有五十年往事今情
賸有老兄悲鴈序千二百里生離死別惟聞嬌女泣萱
幃之句雙星節到人遠東山暮雨瀟瀟悲深同氣可想
見此時情況矣吾妹病革時向東揮淚以不及與姑言
別為恨囑寄銀十兩奉甘旨作遺念此項暫為存貯與
所遺衣飾箱件令甥女檢明書單於棺旋日寄去魯峰
令弟均此道念不盡言

據事直書字字血性

胡雲坡

淒風苦雨吹洒毫端輓聯語意尤極酸楚天地間不

朽至文惟情真人為能道出不以掩遮風雲月露為
貴也 任畏齋

詳死喪之事申忠告之情言真意摯質而彌文吾叔
每進姪等而訓之曰文章政事不外五倫須從誠字
做起讀二書洵以身示教矣 姪炳文

覆孔雲楣書

八月廿三日畢蔡二紀來都接讀手書一字一淚大弟
以多年伉儷未及視含惻焉腸斷矧先以投杖之感繼
以期功之喪聞茲惡耗為增悽然來紀扶柩令由陸路
東歸雲坡司寇以戚誼備極闕切所有奠分五十金額
一及鄭比部東亭奠分三十金聯額一余處賻儀百金
奠儀百金聯額一與所遺衣飾箱篋屬呈銀件統交帶
回來計分送諸戚經敝通家宋侍御酌致諸相知製公
幛一祭文稿為易數聯貴切當也葬期為擇定葬事量

力行之禮以稱為宜也。吾妹歿後，大弟閨中少一直言匡助之人，總以遇事詳審，腳踏實地為承家經久之計。大郎抱病，大弟以父兼母道，錢家兒婦加意卹之。六郎讀書亦緊要事，日計不足，月計有餘也。魯峰令弟至性人也，諸事可以諮商，竊嘗謂人生百行，孝固難友亦不易。兄弟本同氣也，其後日離日疎，間之以妻子，今之以門戶，求無改於童年聚首推梨讓棗之情味，雖士大夫猶或難之，無他嗜欲深而骨肉之性易漓也。以余所聞於魯峰，可謂始終如一者，余有感於妹之存亡而於君。

兄。弟。間。益。神。往。不。置。已。余。前。年。冬。六。旬。初。度。劉。石。菴。前。
輩。所。贈。楹。聯。有。松。以。凌。霜。還。益。壽。鶴。因。警。露。更。高。飛。之。
句。得。頌。不。忘。規。意。因。思。半。生。順。境。毫。無。動。忍。增。益。之。處。
比。年。來。余。與。大。弟。皆。有。不。如。意。事。未。必。非。天。所。以。玉。成。
晚。節。每。對。楹。聯。而。慙。且。奮。也。金。剛。經。為。儒。者。所。弗。道。要。
其。大。意。言。佛。在。心。頭。受。之。以。戒。成。之。以。忍。與。吾。儒。所。言。
實。在。工。夫。是。一。是。二。願。彼。此。共。勉。之。勿。以。泥。佛。土。佛。相。
况。也。邈。自。閩。中。迎。娶。輾。轉。於。悲。愉。欣。戚。忽。已。黃。花。暮。影。
附。於。姻。婭。關。情。愛。德。贈。言。之。例。由。扶。柩。諸。事。而。瑣。及。之。

願大弟勿馳想於聲華益敦篤於倫理即亡妹亦當含
笑地下耳諸希珍攝不宣

從閨中少匡助說起逐層闡念入後交勉以道愈轉

愈深真輸心誓臆之文

紀曉嵐

發揮友道一段令俗子情形畢現於方鏡之中要其
意理又自妹沒時觸緒生來並非題外枝節讀者於
此可悟離題發議之法又可悟按題發議之法

受業
陳池

鳳

與閔中丞書

樓開煙雨人仰靈光每於鶯湖客至敬聞大人茵
鼎頤和起居納吉南雲遙望企念彌深溯自庚子
初春扈

蹕王營假旋梓里追隨旌節垂照良多嗣於丙午嘉平
由閩而北吳江停櫂話舊談心洵歐陽公所謂其
來有自者高門世德至今猶心佩之戊申夏間曾
於熱河

直廬數朝盤桓迨辛亥秋仲

恩命還鄉。輶車遄發。不惟攀送無由。即彼此往還三過。尊齋亦未得望見顏色。一叙濶蹤。私懷彌覺歎然。伏惟大人清操碩望。中外交推。東山復起。自當在指顧間。總之電光泡影。一切如是。凡過去現在未來。心俱不可得。此其中原無實無虛。即所謂無意必固我。於其間與吾儒素位而行之道。確有合者。惟有敬以持之。順以俟之。庶幾無所著而生其心。還得本來面目耳。想深於此中五蘊皆空者。早應如是知如是見如是。是不生法相也。風便泐候肅鳴。

積愀寄呈近作二首竊附於素心相質之義諸惟

台鑒不宣

竟體雅潔後段於儒素工夫確有體認是宋人
說理文字非泛作仙佛觀空語也

褚筠心

引內典以附儒經識解之超具見根氣之厚

受業

盛惇崇

香亭文稿卷九

夢園吳莊論香齋

先考湛山公行狀

我先考之見背於乙酉秋也先二兄玉衡甫歸

省赴任永州玉綸則於辛巳涿州旅次即成永

訣苦塊搶呼有行述一卷告哀也先兄辭世益

傷孤露爰遡先德而質言之無溢無漏將以垂

久故為狀曰考姓吳氏諱士功字惟亮號凌雲

一號湛山先世江西瓦西壩人遠祖諱文盛仕

於元龍世職以武功顯明洪武初以白馬駝家
譜偕胞兄文貴泛武昌遇流賊譜失馬亦死遂
抵河南商城金剛臺下今文盛公塋旁有白馬
墳在焉先考八世祖魏公嘉靖乙酉科孝廉文
盛公後也愛張庄風土淳朴乃由商城而固始
而卜居於此魏公生彥洪公彥洪公生曷公曷
公生來聘公來聘公生志善公皆列膠庠高王
父若谷公諱自榮志善公長子邑庠生以孝友
聞歿與弟自顯同塚曾王父力堂公諱宏緒若

谷公第二子邑廩生投償假銀於水勸以酒食
其人慙感順治庚子歲歎出所儲賑饑事詳州
志王父南長公諱用烈力堂公第六子學問涵
以肆由歲貢生官淇縣訓導時稱南長先生以
文河鼓浪顏其齋通形家言族人貧不能葬擇
已地吉者與之康熙己亥夏淮水溢具舟載糧
以濟存活千餘人事詳縣志自曾王父以下均
以先考官累贈中大夫玉綸官晉贈資政大夫
應贈光祿大夫曾祖妣楊太夫人祖妣王太夫

人繼祖妣陳太夫人均累贈淑人晉贈夫人應
贈一品夫人先王父生子九人先考行六王太
夫人出也生有夙慧年未冠於學無所不貫性
嚴重嘗讀書張庄梓潼廟廟義田王父設也負
耒橫經足不入城市為名諸生二十年壬子舉
於鄉癸丑成進士

世宗憲皇帝廷策授翰林院庶吉士丙辰今

皇上御極之元年改吏部稽勲司主事陞文選司員
外郎考功司郎中三載吏不敢欺銓政以肅已

未擢湖廣道監察御史巡視南漕明年巡視南城稽察萬安倉掌京畿道事自入臺垂三載奏吏部開陞京堂宜由選司開列廢官宜由功司漕務運丁宜嚴盜賣漕員宜懲貪婪督撫題補州縣宜變通奏帶人員宜停罷俱報

可時翰詹科道官分日撰經史講義進呈先考以尚書任賢勿貳去邪勿疑講義進蒙

召對向例非大臣不召對蓋異數云辛酉有以先考狗庇屬官奏者由都察院吏部以指揮郭某違

例用刑業經指叅並無徇庇奏覆

詔原奏者降二級用復

命巡南漕未行適閩督奏陳池王開墾墾塘事詞連
先考初被劾閉戶玩周易怡怡如平時旋得白
治池王罪如律壬戌出為山東濟東泰武道癸
亥七月丁王母陳太夫人艱服闋補直隸大順
廣兵備道丁卯調山東兗沂曹道屬郡饑辦賑
心力畢瘁次年

皇上駕巡山左奏對災黎情形稱

旨再截漕米六十萬石以賑卽

命董其事乃周行六十餘州縣俾無遺濫民以不饑

先是調湖南糧儲道大學士阿襄壯公巡撫山東以端方練達熟悉民情奏留辦賑秋七月事竣改山東糧儲道已巳督運抵通遷山東鹽運使壬申夏東昌泰安沂州蝗中丞鄂公飭令捕蝗令不力先考以告中丞怒欲盡劾罷之先考從容解曰劾一令去委一令來中間更代延擱是予蝗以時日滋食民膏耳矧盡劾耶請展限

蝗不盡倍其罪許之蝗立盡是役也先考晝夜
觸暑奔馳數百里凡六七十日以故事得舉自
此得腹疾遇炎暑輒發先考在運使任廩不自
潤中丞準公鄂公大學士陝甘制軍楊公咸倚
之凡五載屢攝藩臬篆與卓荐者二甲戌陞西
安按察使撫臣大學士桂林陳公也深相得先
考以臬司民命所係案牘必再三閱慮秦民慙
愚擇科條中易犯者令州縣刊木榜示民俾知
趨避時用兵西陲初設臺站先考署西安布政

司事飭所過軍馬次於郊毋入城聽百姓具芻糧與軍交易而退軍民宴然乙亥夏西師告捷晉秩一級丙子調湖北按察使楚俗狡黠多訟先考遇疑獄輒坐燈下反覆求之必得情乃就寢不得則往往達旦某縣有黃某者私人婦婦別有私黃賄人刺所私者死復賄人以應其罪獄具矣先考疑之覆訊得實正其罪所平反多類此丁丑七月以臬司奉

命護巡撫印治廣濟縣獄置私徵加派諸蠹書於法

積弊肅清是年江南河南饑

命撥江西北倉糧五十萬石運交分貯湖北應碾
運二十五萬石先考多方催飭分五次起運限
五日兌開各運如期集事八月陞西安布政使
十一月

命護理西安巡撫時延榆鄜屬災議撥寧夏府及綏
德米脂清澗吳堡四州縣米麥充賑先考以河
運則河易水必俟堅厚乃可渡駝運則山路險
重以冰雪尤難行二者均利在速奏請添雇驢

騾輓運復奏毗連州縣勘不成災者請緩征
上從之又奏嚴司庫交代請於撫藩離任接任奏請
陛見時以庫項存貯支銷清數附

聞

上嘉所奏著為令是月調直隸布政使戊寅三月調
西安布政使仍護理西安巡撫四月赴陝途中
奉

旨授福建巡撫仍留署西安巡撫兼管布政司事七

月

勅加兵部右侍郎都察院副都御史提督軍門計自
丁丑暨戊寅秋僅一載由楚臬而護楚撫由陞
陝藩而護陝撫既調直藩再調陝藩再護陝撫
至是授閩撫仍留署陝撫兼管陝藩古所謂一
歲九遷其官者蔑或過之先考所以夙夜氷兢
圖報

皇。上。眷。顧。之。重。而。不。知。所。出。者。也。是。年。延。榆。災。奏。蠲。
積。年。逋。懸。又。購。騾。三。千。頭。供。西。師。凡。地。不。產。騾。
及。產。騾。而。地。瘠。者。令。弗。與。延。安。府。兵。糧。例。兵。由。

府領糧由縣運奏改就近徵支隴州汧陽額徵屯豆民不支貸歲積紅朽奏改折色陝多麥少穀奏倉穀用麥抵以從民便

上皆允行秦民德之九月涖閩任閩海疆通番夷俗悍多棚民素號難治先考撫輯控制悉心經理會臺灣府風災長樂福清晉江南安同安漳浦詔安等縣旱賑饑緩租貸種食民以大和明年獲南洲盜南洲為閩縣地在江心四面阻水初有薛能太者聚黨為盜數經前撫臣捕斬之其

黨劉良福復為盜與薛德清游艷艷等十八人
行劫附之者衆刺人眼灰漆人面散布水陸為
害官捕之沈哨船弁兵溺焉勢甚張至是被獲
誅良福餘多待以不死黨悉散奉

旨嘉與晉一級於是改汎塘於要地變巡哨之舊法
而南洲無盜患矣又有林成功者黨七十餘人
託業漁戶為盜於江南閩浙間先考盡獲之隨
奏陳四款一漁船責取船主澳甲保結乃准充
一出口應立限逾限不還者坐船主澳甲一貨

物應稽驗以杜夾帶一帆檣宜大書名號以防
匪竊由是閩盜屏息閩屬臺灣隔越海外禁私
渡而土地肥美閩粵人往墾其地者既立業欲
歸則棄業又不得來迎其家大吏憫之往往奏
寬其禁旋停罷先考特以其情疏

聞略曰凡有渡臺人民禁絕往來不能搬移現在臺
地漢民已逾數十萬其父母妻子身居內地者
正復不少若棄之而歸則失謀生之路若置父
母妻子於不顧更非人情所安故其思念父母

繫○戀○妻○孥○實○有○不○能○自○己○之○苦○衷○以○致○急○不○擇○
音○冒○險○偷○渡○百○弊○叢○生○伏○查○乾○隆○十○七○年○原○任○
臺○灣○縣○知○縣○魯○鼎○梅○纂○修○臺○灣○縣○志○云○內○地○窮○
民○在○臺○者○數○十○萬○其○父○母○妻○子○俛○仰○乏○資○急○欲○
赴○臺○就○養○格○於○例○禁○羣○賄○船○戶○頂○冒○水○手○姓○名○
掛○驗○婦○女○則○用○小○漁○船○夜○載○出○口○私○上○大○船○抵○
臺○復○有○漁○船○乘○夜○接○載○名○曰○灌○水○經○汎○口○覺○察○
奸○梢○照○律○問○遣○固○刑○當○其○罪○而○杖○逐○回○籍○之○民○
室○廬○拋○棄○器○物○一○空○矣○更○有○客○頭○串○通○習○水○積○

匪用濕漏船隻收載數百人入艙將艙蓋封釘
不使上下乘夜出洋偶值風濤盡入魚腹比到
岸恐人知覺遇有沙汕輒趕騙離船名曰放生
沙汕斲頭距岸尚遠行至深處陷沒泥淖中名
曰種芋或潮漲漂溺名曰餌魚窮民迫於饑寒
相率入陷阱言之痛心志言如此臣思愚民之
被害奸梢之肆惡魯鼎梅身泣臺灣見聞自確
載諸邑乘考訂非虛臣一載以來留心察訪實
屬確有之事然卒未有因陷溺而告發者緣在

汪○洋○人○跡○罕○到○之○地○被○害○者○既○已○溺○於○波○臣○倖○免○者○亦○緣○自○干○禁○令○莫○敢○控○告○故○例○禁○雖○嚴○而○偷○渡○接○踵○臣○計○自○乾○隆○二○十○三○年○十○二○月○至○二○十○四○年○十○月○一○載○之○中○共○盤○獲○偷○渡○民○人○二○十○五○案○老○幼○男○婦○九○百○九○十○九○名○口○內○溺○斃○男○婦○三○十○名○口○其○已○經○發○覺○者○如○此○其○私○自○過○臺○在○海○洋○被○害○者○恐○不○知○凡○幾○伏○念○內○外○民○人○均○屬○朝○廷○赤○子○向○之○在○臺○為○匪○者○悉○出○隻○身○無○賴○若○安○分○良○民○既○已○報○墾○立○業○有○父○母○妻○子○之○繫○戀○有○

仰○事○俯○育○之○辛○勤○自○必○顧○惜○身○家○各○思○保○聚○此○
從○前○督○撫○諸○臣○所○以○疊○有○給○照○搬○眷○之○請○也○及○
奉○准○行○過○臺○以○後○亦○未○有○在○臺○滋○聚○生○事○者○乃○
因○奸○民○偷○渡○致○令○良○民○在○臺○者○身○同○羈○旅○常○懷○
內○顧○之○憂○在○內○者○悵○望○天○涯○不○免○向○隅○之○泣○以○
故○老○幼○婦○女○焚○獨○無○依○之○人○迫○欲○就○養○竟○致○挺○
而○走○險○畢○命○波○濤○非○所○以○仰○體○我○
皇○上○如○天○之○覆○一○視○之○仁○也○合○無○仰○懇○

勅部定議嗣後除內地隻身無業之民及並無嫡屬

在臺者仍遵例不許過臺有犯即行查拏遞回
外若在臺有業良民果欲迎其祖父母父母妻
妾子女子婦孫男女及同胞兄弟過臺者許赴
臺地接管官報明籍貫眷屬姓氏年歲冊移原
籍覈覆給照回籍撤接其在內地眷屬欲過臺
完聚報明該管地方移臺核覆申督撫給照亦
如之過臺時驗照放行如人照不符而放行及
濫給路照各當該官司均分別議處其餘偷渡
人仍如舊例嚴禁疏入下部議行他若試武闡

兩次必嚴得干城也署學政錄遺必慎廣掄才也酌私鑄情罪輕重恤民命也改邵武兵糧白米為糙米令漳泉富商運買延建各府陳穀平糶寬臺厦商船米禁買補倉穀四十六萬餘石撥運十萬石以濟浙賑重民食也減承辦限期以清案牘暨設州縣自理詞訟審報格式以免拖累計每年通省所結一萬七八千餘件所存不及二千件勤民事也凡有便於人者必具奏奏必得

俞旨撫閩四年所以興利除害者玉綸亦不能詳今

舉什一於千百以見惠愛在民由

皇。上。信。之。深。任。之。重。也。辛巳以會審提督馬龍圖侵

餉事坐失出赴北路軍營効力玉衡玉綸具呈

請代經軍機大臣轉奏有且令伊父往之

命次年

予歸八月抵里門以玉綸等擬乞假歸省馳諭曰吾

受

上恩曠職負疚今

賜還爾等宜何如銜感如圖歸是為忘

君恩不忠逆父志不孝吾得閒靜自養眠食殊強健

汝等勉之母以我為念又三年卒卒之時玉躬

垂長尺許先考幼侍王太夫人疾禱於神請以

身代獲愈在德州官署命玉綸等歸里治陳太

夫人葬事自命遣時即齋食事竣乃已卜葬王

父於道堂寺手足為之皴裂耕讀墓旁壬子秋

於田間聞捷音以不及逮王父母而泣去道堂

寺里許為雙樓別墅王父讀書處也古木綴平

橋水田稻舍安置琴樽花鳥於煙靄中吳楚間
名宿暨同時縉紳先生如閻戒過家西獵先外
王父永春公相與吟咏其間而後起蒸蒸咸擬
燕山五桂之風先考尤見重於永春公遂以吾
母任太夫人來歸兄瑄五伯父母遺孤也甫四
齡多病吾母撫之後入庠即娶太夫人姪女為
室李太夫人山東巡撫諱燭公孫女早失怙舅
氏陳宗伯諱德華養女也為先考繼配守吾母
治家法哭吾母遺像尤痛自任李兩太夫人後

先棄世庶母張孺人來侍二十餘年從未假以
辭色嘗自笑永署如僧舍先考以義制情者大
抵然也友于之愛最篤四伯父斗山公宰雞澤
聞抱病頻遣使致參苓命玉衡馳營身後事與
七叔父披雲公暮年聚首猶是舊宅同居風味
玉堂弟叔父少子也每喜置膝上曰當為阿姪
得佳婦已遂締姻於永春公孫女若十一叔父
越千公以久困場屋為捐縣佐若兄琤鉞珙珣
以官於外訓備周若姪編修鼎雯安西牧貽桂

以少孤愛更切其餘施諸族屬姻黨者尤難更僕數先考猝遭變以地僻求美木不可得任司馬銘為其母預蓄棺乃以進至易簀屬殯以含以殮皆叔父弟兄子姪輩經營中禮庶幾無憾此亦足徵厚德及人所致然而言之心感恩之心痛蓋二十餘年於茲矣玉綸等幼失恃惟先考是依出就外傳義方之訓必嚴大則杖小則跪雖公事繁弗輟也癸亥讀禮山莊課兄銳及玉綸等口講指畫動至漏下三四十刻或叙先

聖恩。輒。欣。獻。重。為。淬。厲。更。諄。諄。於。倫。紀。之。敦。義。利。之。
防。刻。薄。之。誠。玉。綸。等。雖。至。愚。極。陋。得。稍。有。成。立。
獲。齒。於。士。大。夫。之。林。者。先。考。訓。也。且。喜。拯。人。於。
厄。人。有。善。急。成。之。衛。司。空。諱。哲。治。以。詩。文。見。質。
一。字。之。誤。未。訂。辦。稍。遲。若。自。慙。也。胡。雲。坡。司。寇。
初。來。見。曰。吾。鄉。理。學。前。輩。子。也。用。圓。體。方。大。器。
之。時。司。寇。方。官。京。兆。通。判。也。居。恒。自。謂。待。人。惟。
忠。厚。之。心。自。勝。在。義。理。之。氣。順。逆。之。數。聽。諸。天。

始。終。之。節。慎。諸。已。一。生。得。力。大。半。在。新。吾。語。錄。
中。嗚。呼。先。考。以。固。陵。世。德。之。傳。當。

景運重熙之會依

先帝之末光揚

聖人之休命樹清要之聲華秉封疆之節鉞

褒嘉與

錫賚頻仍追覃先世澤垂後人自先考歸里

玉衡由

郎中出守

玉綸

由庶吉士授檢討每引

見必垂問老親迨服闋

玉衡

以觀察肅州因公抵巴

里坤猶有述先考丰采嘖嘖稱嘆者指老屋數楹謂前于役時所寓也聞而泣下久之玉綸游歷鄉貳初以扈

蹕之暇

恩准展墓及較士八閩頌先德者始終如出一口此皆先考受知於

天子者深故推未竟之

思以逮後嗣得馳驅於山陬海澨覘遺澤於未艾也

先考行誼政事已叙入

國史採諸省志而玉綸追而述之於忠孝仁愛之性隱微幽獨之功尤加詳焉所以申明夫受

知有本推

七

恩有自永永念之勗圖報於奕世子孫無敢忘且以

告立言之君子先考生於康熙己卯年正月初

五日辰時卒於乾隆乙酉年九月二十八日丑

時享壽六十有七雍正癸丑進士翰林院庶吉

士授中大夫晉贈資政大夫應贈光祿大夫兵

部右侍郎都察院右副都御史巡撫福建等處

地方提督軍務兼理糧餉加三級配先妣任太夫人湖廣辰州鎮總兵諱宣勲公孫女福建永春州知州直隸山海關同知諱秉權公女繼配先妣李太夫人山東巡撫諱燭公孫女候選同知諱盟公女均累贈淑人晉贈夫人應贈一品夫人子二任太夫人出長玉衡貢生授中憲大夫甘肅兵備道娶韋氏封恭人候選州同知諱承基公女次即玉綸辛巳進士翰林院檢討授通奉大夫現任兵部右侍郎娶任氏封夫人福

建邵武府知府候補道諱煥公女女一李太夫

人出適聖裔候選員外郎孔公諱廣祚子湖北

監利縣知縣昭烜孫

鼎廳

庚子舉人內閣中書

承

玉衡

嗣娶馬氏禮科給事中龍公女

鼎枚

國學生聘江西南昌府知府黃公良棟女

鼎輔

聘光祿卿蔣公曰綸女

鼎銘

聘山西雁平道邵

公庾曾女

旬八

聘原任福建陸路提督任公承

恩女

壽保

聘刑部尚書胡公季堂女孫女一許

配江西瑞州府知府祝公燾子一許配湖北布

政司陳公准子一許配福建延建邵道光公克
中子一許配江蘇候補道方公煒子一許配廩
生方公熊子一許配禮部侍郎劉公躍雲子一
尚幼曾孫以醇聘候補州判宋君林女次二尚
幼曾孫女一許配候補通判韋君協夢子次二
尚幼謹撰次如右并乞同年大學士王公杰填
諱乾隆戊申春仲孤玉綸謹狀

前以時叙為經後以事叙為緯忠孝之旨溢
露毫端臺民移眷一疏愷惻詳明得古大臣

為民請命之義文於序次簡要中載入全疏

尤見龍門史法

褚筠心

紀國恩之厚溯家學之源質語深情言歸

體要

項豫齋

至敬無文述先世學問功德而求工于文字

已失立言之本讀吾師此作事事朴直叙去

絕不為膚詞諛語而先人生平行事本末具

見高處只在一質字而情至而文自生則魏

文帝所謂筆墨之情殆不可勝者乎

受業成學錄

恭錄家傳四篇

贈資政大夫吳力堂公傳

劉壖石菴

公姓吳氏諱宏緒字克家號力堂先世江西人有仕於元者曰文盛以武功顯明洪武初遷河南商城之金岡臺六世祖巍由商城遷固始之張庄世以篤學重庠序公父自榮自甲申後即不與科舉課公讀書甚嚴維時流賊決河灌汴城居民蕩析我

朝甫定鼎學使駐河北淇縣調各州縣生赴之固

始○去○淇○縣○千○餘○里○公○承○父○命○赴○試○村○墟○經○兵○火○
後○行○竟○日○少○人○煙○草○竊○時○出○沒○道○旁○白○骨○如○麻○
鬼○哭○魑○吟○陰○風○淒○人○心○耳○而○公○以○單○騎○走○氣○益○
壯○登○覽○益○廣○顧○黃○河○之○奔○流○慨○然○想○見○古○豪○傑○
而○文○益○以○疎○宕○自○喜○計○往○來○十○七○日○補○學○官○弟○
子○員○歸○省○公○之○父○意○甚○慰○也○公○執○喪○廬○墓○三○年○
奉○父○之○柩○與○叔○父○自○顯○合○塚○遺○命○也○撫○孤○從○子○
三○如○已○出○族○之○貧○苦○者○濟○之○不○婚○嫁○者○助○之○不○
能○殮○且○葬○者○以○棺○與○地○周○之○歲○大○饑○里○中○多○餓○

者出粟賑之有以假銀償者勸以酒食曰吾本不欲汝償若仍與汝汝將他誑將不利於汝投之水其人慙感去張庄南十餘里為雙樓別墅

公讀書處也古木平橋撫琴搏於空濛煙靄中貌肅而神恬學博而志大每以兵火餘生得享太平之福五六十不得一第慨然嘆曰余老矣其如命何而公之門人卓卓多所成就予五人孫九人曾孫之及見者七八人迨後以經術光顯皆公訓也公之訓子弟也凡歲除前一日

解館正月朔四日開館平時不飲酒非入泮不
著絲縷管絃之音不入後堂喪祭事僧道不入
門凡循循雅飭寧朴母華望而識為張庄吳氏
子弟也吳氏至今守公家訓罔敢越公以孫士
功由庶吉士至福建巡撫贈如其官以曾孫少
司馬玉綸前在太常寺卿任

貤贈資政大夫壽八十有二丁未秋仲撰

贈資政大夫吳南長先生傳

程晉芳

魚門

歲庚子夏吳中丞玉綸彙其祖南長先生傳及

河南省志鄉賢傳示余余讀竟而嘆曰夫其肆
力於學足跡不入城市以其產之厚者易諸兄
弟教子弟暨門弟子毋近利毋好名請於官立
貴善公非鼓二警其鄉人凡所得於學必期身
體力行有濟於物學者稱南長先生以文河鼓
浪顏其齋洵無愧也而陰德之尤大者方康熙
乙酉夏淮河漲環河以南為張庄地勢特峻水
將及其河北一帶巨浸也重以陰雨決旬不能
涸民多溺死其存者漂泊呼號或棲於樹之巔

危樓之脊就稍高處而蟻聚焉不得食旦夕且死先生亟募善水者拏舟數隻載米及錢曰救一人與汝錢五百援舟而上者踵相接也食以粥且食且救舟且滿登之南岸舟往來日再三且十餘日所全不下數千人嗚呼此一事可以風矣先生諱用烈字南長號牧伯先世江西人其仕於元者曰文盛嚴世職以武功顯以白馬馱家譜汎武昌遇流賊譜失馬亦死始遷河南商城金岡臺下今文盛公塋旁有白馬墳在焉

所稱白馬吳家是也七世祖魏再遷固始之張
庄代有文人邑廩生宏緒先生考也先生歲貢
生選淇縣訓導未赴任卒子九人孫曾五十餘
人類能有所樹立其卓卓者文章政事後先領
袖中州孫鉞以主簿死水果木之難入昭忠祠
官雖卑亦足與諸君子光先生也先生以子古
功由庶吉士官福建巡撫

累贈中大夫以孫玉綸由檢討前在太常寺卿任

晉贈資政大夫

論曰由明以來河南甲族推新安呂氏今呂氏
寢衰矣而固始吳氏盛焉同時光山胡氏亦以
經學起家然彼以晚年而遇吳氏則遲之又久
而後發余嘗與中丞比鄰居猶未罄其先世所
積也而今乃知之人亦孰不欲其子孫富且貴
而不能以天所好與天惟異夫以已之所好與
已何也嗚呼為善無不報而遲速有時胡不聞
南長先生之風也

吳中丞傳

董邦達 東山

公姓吳氏諱士功字惟亮號凌雲一號湛山先
世有仕元以武功顯者曰文盛明洪武初避兵
以白馬駝譜由江西遷河南商城金岡臺其由
商城遷固始之張庄則自八世祖魏始代以耕
讀孝友世其家大父宏緒邑廩生父用烈歲貢
生司訓淇縣皆常出其家財活難人人謂吳氏
有陰德其後必大公天資絕人未冠以博瞻稱
為文恥詭遇困場屋者二十年雍正壬子癸丑
聯捷選庶吉士乾隆丙辰散館改吏部累遷至

郎中遇事能立堂上與大宰爭是非已未遷湖
廣道御史尋掌京畿道數上章言事有直聲適
閩督奏土豪陳池玉開墾竿塘事詞連公旋得
白或謂公宜謁謝白公誣者公曰固彼職也何
謝為壬戌出為山東濟東道未幾以後母喪去
官丙寅起為直隸大名道明年移山東充沂曹
道賑屬郡饑是年

上幸山左奏對稱

旨轉督糧道再遷鹽運司使五年醴政舉頻攝治藩

臬事大吏賢之再以循卓薦甲戌遷西安按察
司使丙子移湖北秦民愚輕犯法楚民黠善舞
法公兩治之獄多平尋攝巡撫事時廣濟縣民
苦私徵久矣公立縛羣吏至悉置之法諸官吏
聞風皆斂手不敢為非丁丑秋遷西安布政司
使冬移直隸明年三月再還西安尋
命巡撫福建猶留攝陝撫事七月蒞閩公所至以民
食為根本尤重採荒初在山東歲旱蝗大吏怒
捕蝗令欲悉劾罷去公爭之則請親往疾馳烈

日○中○日○數○百○里○至○則○蝗○立○盡○不○為○灾○西○安○延○榆○
廊○三○郡○歲○不○登○路○險○賑○粟○不○時○達○民○旦○夕○且○死○
公○更○運○法○飛○輓○立○至○籍○其○積○年○逋○懸○數○
上○聞○盡○予○除○免○及○踐○任○外○則○臺○灣○以○颶○風○告○壞○民○田○

廬○殺○人○畜○內○數○郡○旱○種○不○入○土○民○大○饑○公○不○暇○
他○事○立○奏○請○發○粟○緩○租○貸○種○食○各○事○宜○行○之○民○
用○完○聚○無○流○亡○南○洲○者○聞○之○盜○藪○也○在○江○中○阻○
險○有○劉○良○福○者○踞○為○巢○與○副○賊○游○艷○艷○等○十○八○
人○放○賊○四○劫○刺○人○眼○灰○漆○人○面○沉○哨○船○弁○兵○溺○

馬○又○有○巨○盜○林○成○功○亦○聚○黨○數○十○人○當○是○時○閩○
苦○盜○盜○且○及○江○浙○公○至○不○數○月○次○第○就○縛○誅○其○
魁○餘○皆○待○以○不○死○閩○盜○平○又○奏○寬○臺○灣○私○渡○之○
禁○便○閩○粵○人○之○在○臺○著○業○者○得○迎○父○母○妻○子○以○
自○完○其○家○臺○民○德○公○至○今○語○及○前○事○猶○感○激○泣○
下○也○公○之○為○政○剛○而○不○殘○仁○而○不○弛○為○外○吏○二○
十○年○持○是○道○不○變○在○閩○四○載○被○

上○眷○益○厚○辛○已○以○承○問○提○督○馬○龍○圖○侵○餉○事○坐○失○出○
命○往○北○路○軍○營○効○力○明○年○

恩旨予歸又五年乙酉九月丙申卒春秋六十有七

初公還里二子均官京師請歸省公不許

上每見公二子必問公年齒衰壯人以告公謂公將

復用公曰

聖恩高厚苟復出必以死報既而自循其鬢髮則又歎曰吾已不堪復為世用矣卒之夕呼其家人

曰語兩兒好為之言訖而逝無一語及家事嗚呼可以知公之心矣公祖父均以公貴贈中大夫祖母楊氏母王氏繼母陳氏均贈淑人夫人

任氏李氏贈亦如之子二玉衡刑部郎中知湖

南永州府玉綸乾隆辛巳進士翰林院檢討

論曰公起自耕讀中為

國重臣後雖去位名亦足以顯于天下矣乃予聞

公曾大父自榮與弟自顯相友愛歿而命與同

塚又聞公幼侍母疾禱於神請以身代若神許

之愈然後知孝友之流澤長也嗚呼休哉

誥授中大夫應授資政大夫原任福建巡撫提

督軍務兵部右侍郎都察院右副都御史吳

公墓誌銘

鄭虎文

炳也

乾隆三十年歲次乙酉九月丙申

誥授中大夫應投資政大夫原任福建巡撫提督軍務兵部右侍郎都察院右副都御史吳公卒于

里訃於

朝朝之士素與公游者知公受知

天子深蓄德哀施行起大用而卒不及俟以竟所學

相與歎息泣下走唁其孤檢討玉綸於邸舍玉

綸則繄然喪服頓首涕泣乞銘於其師編修鄭

虎文曰不孝即日徒步出國門忍須臾死將謀
藏先人於吉兆維先生文直而不華敢請銘文
曰公行應銘法勿敢辭明年拜使者于庭以公
狀來按狀公姓吳氏諱士功字惟亮號凌雲一
號湛山先世江西人其仕于元者曰文盛嚴世
職以武功顯始遷河南商城縣八世祖巍再遷
固始之張庄又五傳而至自榮邑庠生歿與弟
自顯同塚代有偉人里式孝友是生公祖宏緒
邑廩生歲饑嘗出粟廩食餓者宏緒生公考用

烈淇縣訓導通形家言族人貧不能葬輒擇已
地吉者與之淮水溢具舟糧活人人用是知吳
氏後必有達者均以公貴贈如公官祖母楊太
夫人母王太夫人繼母陳太夫人都累贈淑人
應贈夫人公生有夙慧性嚴重能委已于學嘗
讀書張庄梓潼廟終歲斷跡城市雍正十年壬
子舉于鄉明年成進士入詞館丙辰今

皇上御極之元年改吏部主事累遷至監察御史歷
湖廣京畿道時督撫臣輒奏請以所知官自隨

滋不法公奏罷之巡南漕漕官貪縱丁可盜米
賣不問奏設科禁又進尚書任賢勿貳去邪勿
疑講義

召見蓋異數也未幾聞督某奏他事詞連公旋得白
或謂公宜謁謝白公誣者公曰此是彼職何謝
為其嚴正類如此壬戌出為山東濟東泰武道
居後母喪去職服闋起為直隸大順廣兵備道
丁卯移山東兗沂曹道是年屬郡饑

駕幸山左

召公入對。公具以狀聞。

上為再截留漕米六十萬石。即

命公董振。既事民忘其災。轉督糧道。再遷鹽運司使。

庶不自潤。壬申夏。東昌泰安沂州蝗。吏捕不力。

公親觸熱。晝夜馳數百里。盡六七十日。所至蝗

立盡。大吏嗟賞。上其勞。又以循卓荐者再

上。由是知公才駿。駿乎向用矣。甲戌遷西安按察使。

丙子移湖北。湖北多私徵。廣濟為甚。丁丑會公攝巡撫。事窮治其獄。羣吏咋不敢蹈故習。民用

完實是秋遷西安布政使兼攝撫篆冬移直隸
明年春再還西安未至遂有巡撫福建之

命未得替仍留攝陝撫延榆鄜災民旦夕且死公更
輓運法以濟道懸之未入及入未備者皆以丐
之地之多麥者用抵倉穀從民便又奏更司庫
交代法

天子下其章于天下著為令首尾一載法成令修七
月

勅加兵部右侍郎都察院右副都御史踐閩任至則

臺灣以颶災告長樂福清晉江南安同安漳浦
詔安等縣以旱告公立馳奏發倉廩緩歲租貸
種食民以大和明年獲南洲盜南洲四面阻水
初為盜薛能太所竄伏能太誅其黨劉良福者
復嘯聚勢張屢不利于弁兵又有林成功者業
漁為盜於江南閩浙間黨各數十百人公皆收
縛之誅魁釋從閩盜屏息臺灣海外上郡也禁
私渡而民犯死偷渡者日益衆故臺灣令魯鼎
梅修縣志略云內地窮民在臺者數十萬其父

母妻子欲就養格于禁例賄船戶冒水手姓名
掛驗婦女則載以小船出口上大船抵臺復用
船接載率以夜行名曰灌水更有客頭勾通習
水積匪用濕漏船收載多人入艙閉艙封釘遇
風則盡入魚腹比及岸遇有沙汕駝之上名曰
放生沙汕斷處或距岬遠行沒泥淖中名曰種
芋或潮漲漂溺名曰餌魚窮民迫于饑寒相率
入陷阱如此言之痛心公于是據志語入告請
弛禁從之撫閩三年凡有便于民者必奏奏必

得

俞旨刑德並流民彝安之既而提督馬龍圖以侵餉

論繫公治其獄坐失出

命往北路軍營効力時辛巳冬也明年

予歸又五年卒年六十有七公篤于至性幼侍母王

太夫人疾額神以身代若神許之愈事繼母彌

謹葬贈公于道堂寺躬負土手足皴裂撫九孤

子瑄如已子卒為名諸生公體幹修偉美鬚髯
為人沉毅有大略能拯人于厄好直言意度豁

如也。既歸田終日擁書坐一室時公二子官京師每見

上

上必垂問及公或以告公謂公當復用公。瞪目曰。果爾。必。以。死。報。既。而。自。引。其。髯。曰。臣。精。已。銷。亡。恐。不。堪。復。為。世。用。矣。則。又。歎。歎。若。不。自。勝。者。卒。之。日。遺。命。勗。兩。子。盡。心。官。守。無。一。語。及。家。事。聞。者。悲。之。公。夫。人。任。氏。湖。廣。辰。州。鎮。總。兵。宣。勲。孫。女。直。隸。山。海。關。同。知。秉。權。女。後。夫。人。李。氏。山。東。巡。

撫渭孫女候選同知盟女皆有婦德均累贈淑
人應贈夫人任夫人所出子二玉衡刑部陝西
司郎中知湖南永州府玉綸辛巳進士翰林院
檢討李夫人所出女一適聖裔候選員外郎孔
廣祚子拔貢生昭烜孫一鼎颺公之孤將于乾
隆三十二年十一月三十日葬公于馬家河之
南原兩夫人皆先公卒十九年葬任夫人于道
堂寺先塋八年葬李夫人于晉家庄既固既安
遺命不祔

銘曰赫赫中丞自其躬興亦曜于時胡卒不廷
非卒不廷而年不再羸惟羸其後以永名更于
萬年母傷其穴與塋

先母任太夫人暨繼母李太夫人行略

吾母姓任氏為河南息縣望族外曾祖諱宣勲湖廣辰州總兵外祖諱秉權直隸山海關同知康熙戊戌年十八歸先大夫逮事先祖暨先繼祖母陳太夫人孝敬無渝則以不及事先祖母王太夫人為恨詢及王太夫人遺事輒哽咽不能已廟見後請輪日與諸嫂司中饋陳太夫人以新婦憐之母曰婦職也請益力然吾母實不善爨事每油賤及刀割傷手卒不言先大夫以諸生食貧與諸伯叔父析產後遭先王父大故困益甚益肆力

於學得吾母始終黽勉慰勞備至越癸丑以庶常官於

京甲寅吾母攜玉綸與兄玉衡從兄瑄依京邸瑄乃五

伯父諱士貞遺孤五伯母病將危以瑄屬吾母蓋癸卯

夏也時瑄四歲以缺乳久病尚未離懷抱中吾母拊而

泣五伯母奄奄不能出聲諸伯叔母環視俱淚下瑄又

以初離母啼不止吾母日嚼粉養哺之夜或呼燈火抱

以走迨七歲病痢日數十次方炎暑穢淋漓牀褥間其

氣不可邇瑄卧吾母卧瑄起吾母起老嫗勸稍休曰吾

非自苦恐無以見吾嫂於地下也老嫗魏姓玉綸乳母

也與玉綸追述之猶感泣戊午三月朔六日吾母以病卒壽三十有八玉衡十歲玉綸七歲琯已十九歲矣扶吾母之柩歸里後為名諸生所娶即吾母兄女越吾母卒之一年繼母李太夫人來歸李太夫人天津望族外曾祖諱渭山東巡撫外祖諱盟候選同知少失怙育於舅氏陳宗伯德華為女來歸時先大夫方由銓曹遷御史較任太夫人初至京家稍給內外供役稍備衣食餅餌諸物必親自檢點而後進手書先人及任太夫人忌日單設奠必豐潔哭任太夫人遺像尤痛已未冬先大

夫巡漕江南歲將除玉綸兄弟自外傳歸適宗伯家饋
歲玉綸索柿母與以柑玉綸堅索母仍不與玉綸以柑
擲諸地母笑曰汝何知頃已告汝矣柿性寒汝初病起
不與汝食也再三喻之玉綸方就寢少焉醒微聞母泣
聲蓋慨然於後母之難也而母保護玉綸等及委折教
玉綸等之苦衷多類此于妹之生也卧病年餘癸亥正
月隨先大夫之任山左二月二十九日卒於署壽二十
有七李太夫人卒後又十餘年而先大夫厯官至巡撫
時魏老嫗尚在常語玉綸曰李太夫人歸吾家五年雖

未嘗茹苦然亦不及今日任太夫人歸吾家二十有一
年苦乃備嘗之歿猶殮以嫁衣惜兩太夫人皆不及見
今日也玉綸聞其語而滋痛焉任太夫人生余兄弟二
人長玉衡官肅州兵備道次即玉綸李太夫人生一妹
妹夫孔昭烜以孝廉候選知縣孫男二鼎颺端生曾孫
男桐孫任太夫人葬道堂寺祖塋側李太夫人葬晉家
庄先先大夫之葬也有年矣既固既安遺命不祔均累
贈淑人以玉綸官太常寺卿加一級均贈夫人乾隆丁
酉男玉綸泣述

每於瑣碎閒冷處摹寫傳神深得古人志傳遺法真
布帛菽粟百讀不厭之文

程聘山

切 彭雲楫

序次得如話如畫慈母孝子之情隱然可思篇中或
分或合或詳或畧與太史公合傳體制如出一手

業陳萬肯